


Proyectonan den area di Village ta wordo inaugura awe Diahuebs



ORANJESTAD (AAN): Awe Diahuebs ta inaugura e proyectonan di renobacion Village, St. Maartenstraat y e parke mey mey di Hulpbestuurskantoor y Postkantoor di San Nicolas. E trabounan a cuminsa aña pasa y a yega na un punto culminante. E inauguracion di e proyectonan aki ta bay tuma luga diahuebs awor, conhuntamente cu celebracion semanal di Carubian. Hopi atencion a wordo poni riba e proyectonan aki, pa motibo cu Village en general ta un bario cu semper a keda lubida y structuralmente a cay atras.

St. Maartenstraat ta e prome di e camindanan cu a keda cla y por wordo considera como e modelo pa e siguiente cayanan di Village. Esnan cu tin hopi tempo sin pasa den St. Maartenstraat por ta sigur cu nan lo keda asombra cu e cambio positivo cu tin awo. E caya a wordo cambia pa uno di un direccion y a crea parkeerplaats. E acera ta completamente di klinkers y a planta un cantidad grandi di mata. St. Maartenstraat awo ta un caminda cu mucho mas enfoka riba e 'persona' en bes di e auto. Como cu e ta un area residencial, a instala 'verkeersplateau' y haci'e di un direccion pa mas seguridad y tranquilidad. Habitantenan ta comenta caba cu esaki ta algo hopi positivo pa e bario mes. Autonan ta core mucho mas trankil awo y hobennan ta hunga y cana mas sigur.

Na e punta pabou di St. Maartenstraat a construi un parke. Den centro di San Nicolas, e parke aki ta crea un area excelente pa keiro of simplemente sinta disfruta di e sombra y biento. Rond di e parke aki tin hopi oficinanan importante pa comunidad di

San Nicolas, Hulpbestuurskantoor, oficina di SETAR, Postkantoor. Hasta a habri un oficina di informacion pa turista, e enfoka nobo pa San Nicolas por atrae mas turista y asina trece un biento positivo y prospero. E prome paso pa engrandece San Nicolas ta cuminsa cu renobacion

di e ciudad su infraestructura decaí y hopi bieu. E prome paso a wordo tuma, bin celebra diahuebs awo, conhunto cu Carubian, e inauguracion di e comienso di e renobacion di centro di San Nicolas. Un momento unico pa ta presenta pa wak e bon trabou cu mester sigui.